

von Wulf Wager

## Handwerkerfrust



Hend Sia en letschter Zeit amol an Handwerker braucht? Net? I scho. Des Problem isch bloß: die brauchat mi scheint 's net.

Scho vor der letschta Heizperiode han i mein Haezongsbauer agrufa und om an Komplettcheck gebeta. Nach em dritta A'ruf war mr's z'bleed ond i han da Wendr übr halt ohne Check g'hoizt. Em Büro isch mr a Lamp vrreckt. Deshab han i bei ra namhafta Elektrofirma, wo

ich scho an Haufa Geld für a neue Waschmaschee ond an neua Kaffeevollautomata liega lassa han, agrufa ond da Monteur bestellt. Zudem hätt i no a weitere Bürolamp' montiert han solla. Nochedem i drei Mol nochtelefontiert han, han i au des aufgeba. Jetzt han i letscht Woch' ma andera Elektriker a'glitta, aber der hot sich bislang au no net gmeldet. No bleibat meine Mitarbeiter halt em donkla hocka. No kennat se sich scho amol an die Energiewende gwehna. Scho gspart. Alles hot au sei positive Seite.

Mein Rolladabauer han e bloß ens Haus brocht, weil i ehn beim Jogga vor seine Kamerada a'gsproch han, wann 'r denn endlich amol käm. No hot'r gsait, er käm glei morga. Ond so isch no tatsächlich au gwäa. Mei Fläschner vrspricht mr scho seit ma Johr, dass'r die Gummilippa an dr Duschabtrennung "näggschd Woch" brengt. I han koi Ahnung von was die lebat?

I wondre mi bloß, worom Handwerker soviel Geld für Werbung ausgebat, ond no net schaffa wellat.

Des Domme isch halt, i ka des net für mi b'halta. I erzähl des oifach weiter, sogar 100.000-fach hier en dem Blättle. Scheint's verdienat dia Handwerker gnuag. Aber deshalb kommat se au net en da Hemmel. Dr Petrus isch nämlich net eiverstande, dass die Handwerker dort d' A'fahrt be-rechnat...

Bis näggschd Woch'

Ihr

Alle Kolumna zom Nochlesa  
ondr [www.woascht.de](http://www.woascht.de)  
odr em Facebook em  
Wulf Wager Fanclub